

Yech mirop kwa'n mixë'l San Per

¿Ma go wech no bizan, men che'n Jesukrist?

1 ¹Na Simón Per, nak da tu mos che'n Jesukrist, nela tu xa' nado ga' lo Me; mbaino mizo Jesukrist da nak da nu tu apost che'n Me. Kixëla yech re' lo rë go; por dox wen laxto' Jesukrist kun go, Me nak Dios che'n be no Me ngulo' be lo kwa'n nzë'b xki be, nu go ñila Me kun dub laxto' go, nela no ga'. ²Kina'ba lo Dios, yar más rë yalnazhon che'n Dios kun go, mbaino par le' Me dox wen ban go por nilibe' go xmod nak Dios no Jesukrist, Me nile' mandad be.

Ñal gak rë men che'n Jesukrist nela xmod nzhakla Dios

³Por yalnazhon che'n Jesukrist, mine' Me rë kwa'n naki'n be par ban be zilita' nela xmod nzhakla Dios. Rë kure' mine' Jesukrist ka' be, par li'be' be xmod nak Dios, Me ngurezh be par gak be nela lë' Me. ⁴Por rë kure', mila' Dios di'zh, ne' Me rë kwa'n nazhon no rë kwa'n dox tsak ka' be. Por ñila be rë kwa'n mila' Dios di'zh re', nu be gak nela lë' Me; por rë yalnazhon re', nguro' be lo rë kwa'n nitsinu men; rë kure' nak rë kwa'n nzhakla kwerp che'n men. ⁵Por ñila go Jesukrist, ñal bile' pa' go, gok nambe laxto' go lo rë kwa'n, par walika libe' go xmod nak Dios. ⁶No por walipa' milibe' go xmod nak Dios, orze' gak ka'n go lo rë kwa'n nzhakla kwerp che'n go; no or naban go sa', gak xek go lo rë kwa'n nizak go por nak go men che'n Jesukrist; no or yent kwan ña laxto' go lo rë kuba', orze'se lë' go xo'byek le' go kwa'n nzhakla Dios. ⁷Or

mixo'byek go Dios, orze' lè' go kwin wen kun rë wech go, men che'n Jesukrist; no or nile' go kuba', lè' go chizhi' rë men dub la go.

⁸Chi lè' go walika naban lo rë che'n Dios re', mbaino kitsiyar goi, orze' dox zu' nak go men che'n Dios, mbaino gat lè't ka mbin go widi'zh che'n Jesukrist, Me nile' mandad be.

⁹Men xa' nzhah nak men che'n Jesukrist, no gat nabant xa' lo rë kure', orze' nak xa' nela tu men nikal lo ga'; mia'l laxto' xa', ngulo' Dios xa' lo kwa'n gat lè'. ¹⁰Rë go wech no bizan, men che'n Jesukrist, ngurezh Dios go, nak go men che'n Me, no ngule Me go par le' go kwa'n nzhakla Me. Chi nzhakla go, nayot la' go nez che'n Dios, ñal más kën laxto' go, ro'b lo rë che'n Dios ke lè'la or galo, nes par ne rë men, nzho ka kwent nak go men che'n Dios. ¹¹Orze' Jesukrist, Me nile' mandad be, no Me ngulo' be lo kwa'n nzè'b xki be, dub la Me xa'l Me plo yo go, plo kinu Me nile' Me mandad par dubta'.

¹²Kuze', lè'da dizh ra' kure' lo go; ter nane la goi, mbaino ter naye ka nzo go lo widi'zh che'n Jesukrist kwa'n mitse'd la go. ¹³Ter ka xche'ptsa naban da, per ñal dizhnun go par tsila go rë kure'.

¹⁴Lè'da nane la, porke lè' Jesukrist Me nile' mandad be ne lai lon, ka xche'ptsa naban da yizhyuo re'.

¹⁵Kuze', kikën laxto'n par len rë kwa'n gak len; nez par or gat da, naya'lt laxto' go rë kure'.

Yub Per une yalnazon che'n Jesukrist

¹⁶Or milu' no lo go, xmod nak rë yalnazon che'n Jesukrist Me nile' mandad be, no xmod gak or yè'd Me xtu wèlt, gat lè't michao' yek no rë kwa'n ne no lo go re'; kun yub zalo no une no yalnazon che'n Jesukrist kwa'n nilu', lè'gaka Me Dios; ¹⁷rë no nzhin or milu' Xuz be Dios, lè'gaka Jesukrist nazon, mbaino ne Dios lo no: “Miyi' re' nak Xga'na, Xa' dox nazhi' da, mbaino dox nizak laxto'n niwi'n lo Xga'na re'.” ¹⁸Yub no mbin, or midi'zh Dios; mien chi Me dizde lo yibè' or nzo no kun Jesukrist yek yi' che'n Dios.

¹⁹Kuze' nanen, walika xti'zh Dios, rë kwa'n midi'zh rë xa' nzhala por Dios; kuze' kina'ba lo go, wayila go rë kwa'n midi'zh rë xa' ze'; lè'i zu' par ne go xmod ñal ban go, haxta zhë yubre Jesukrist kun rë yalnazon che'n Me, kwa'n lu' nela or nilen ngubizh ga'. ²⁰Naki'n galo laka ne go: rë widi'zh che'n

Dios kwa'n midi'zh rē profet xa' nzhala, ni tu men nagakt zobyeke kun mis xigab che'n xa', ²¹porke rē profet, xa' midi'zh por Dios nzhala, nangadi'zht bixa' kwa'n nzē yek bixa', lē' bixa' midi'zh por Sprit che'n Dios, nela xmod nzhakla Dios.

Men xa' nigoch widi'zh che'n Dios

(Judas 4-13)

2 ¹Nzhala, xid rē men Israel, nguio rē xa' chigab walika men nidi'zh por Dios; se'ska yo men xid go, xa' chigab walika nilu' widi'zh che'n Jesukrist. Yo bixa' xid go, no nayanut laxto' go cho xigab che'n bixa', mbaino lē' bixa' le', ro'ya' pla rē xa' nzho xid go lo yub pa' widi'zh che'n Jesukrist, haxta di'zh bixa', gat lē't Dios Jesukrist, ter kun yub ren che'n Me nguzi' Me bixa'. Por nak bixa' sa', lē' bixa' yachib lo kwa'n lo'x bixa' tuli; ²no por nizen bixa' tu-xtu una', nayax men che'n Jesukrist tsinu bixa', orze' lē' men di'zh nakap tich widi'zh viv che'n Jesukrist. ³No por nzhakla bixa' lat bixa' rē che'n go, nix laka chao' yek bixa' rē kwa'n lu' bixa' lo go, per nadedt lē' bixa' yachib lo kwa'n lo'x bixa', porke dizde nzhala, nak la di'zh kwan zak bixa'.

⁴Bitsila go, nangaya'lt laxto' Dios rē kwa'n mile' rē ganj, rē xa' ngok nayi'lazh lo Me; tuli mila Me rē ganj ze' le'n gabil plo nali'b bixa' kun kaden, no plo dox nakao, haxta or gab Dios xmod gak kun lē' bixa'. ⁵Mbaino nu milo'x Dios kun yiu nazhe'b rē men nguio chi tiemp, rē xa' ngok nayi'lazh lo Me. Per nab tsa Noé kun za gazh rē xa' lizh xa' nangala't Dios ngat, porke midi'zh Noé lo rē men, naki'n ban bixa' nela xmod nzhakla Dios. ⁶No bitsila go, nu ska yezh Sodoma mbaino yezh Gomorra milo'x Dios, de laka mila' Diose. Ngok rē kure' par ne rē men xa' laore yo, xmod nili'nu Dios rē men nakap. ⁷Per Lot, tu miyi' mbin ro' Dios, nangala't Dios ngat xa' xid rē men ze'. Ter miban Lot xid rē men kwa'n nangont ro' Dios, per dox mile' Lot xigab, porke tu men-xtu men nizen bixa', niyitnu bixa'. ⁸Lē' Lot, xa' naban nambe lo Dios, dub miban xa' xid rē men ze', zilita' miwin laxto' xa', por rē kwa'n une xa' no mbin xa', nile' rē men nakap ze'.

⁹Rē kure' nilu', lē' Dios nzhak nigo' rē men nzhon ro' Me lo rē kwa'n nazhe'b, mbaino nane ka Me plo ñala' Me rē men nayi'lazh, rē xa' gat nzhont ro' Me, haxta zhin zhē gab Me

xkwan zak bixa'. ¹⁰Per más zakzi Dios rē xa' minu la lo rē kwa'n nzhakla kwerp che'n, mbaino rē xa' gat nzhont ro' Jesukrist.

Nad bixa', mbaino niye laxto' bixa', gat nizhebt bixa' niye bixa' rē sprit, xa' nile' mandad yizhyuo re'. ¹¹No ter más nile' rē ganj che'n Dios mandad ke rē sprit xa' nile' mandad yizhyuo re', per ni nangaye laxto' rē ganj re', ngaye bixa' rē sprit re'. ¹²Per rē men re', niye bixa' rē kwa'n nanet bixa' kwan. Nak bixa' nela rē ma ga'; yent xigab yek bixa'; nela tu ma, nzhaal ma namás par gao xtu ma ma. Se'ska lox rē men ba' por minu la bixa' lo rē kwa'n nakap nile' bixa'.

¹³Lē' Dios zakzi bixa' por nizakzi bixa' más men. Kwa'n más ño laxto' bixa' nak, nzhao cho' bixa' mbaino nzho cho' bixa'i dilant lo men; kuze', or nibin rē go par gao go, dox nitula go nile' bixa'. ¹⁴Nikwa'n laka bixa' cho una' gat naya't ga' kun lē' bixa', no gat ñazhat bixa', nile' bixa' kwa'n gat lē'; mbaino nikwa'n laka bixa' rē men nanet be's xmod nak widi'zh pa' che'n Dios, par lat bixa' kwa'n nak che'n rē men re', porke lē' bixa' nzhak lai, kuze' nzhi'bde la bixa' lo Dios. ¹⁵Nguziwan bixa' por nguruya' bixa' nez nali che'n Dios, nela ngok Balaam, xga'n Beor; mile' xa' kwa'n gat lē' nab tsa par gap xa' dimi. ¹⁶Per por xtol Balaam, yub burr kwa'n nzob Balaam midi'zh nayi' lo xa' nela tu men ga', par mikwē'z ma Balaam lo xigab tont kwa'n kinu xa'.

¹⁷Rē men re', xa' nilu' widi'zh che'n Dios xa'la mod, nak bixa' nela plo nilen nits per mibizh nitse, o nela rē xkao kwa'n gat nilat yiu, rē plo nzhuwe' mbiy. Kuze', nak la di'zh, lē' bixa' lox par dubta' plo más nakao, ¹⁸porke nilu' bixa' widi'zh dox ya mbaino dox nagan par zobyek mene, per yent kwan zu'i; niki'l bixa' men par nu men le' rē kwa'n nzhakla kwerp che'n men, par nile' bixa' niru'ya' rē men re' lo widi'zh pa' che'n Dios, rē xa' kwa'n pe'n nguro' lo rē kwa'n gat lē'. ¹⁹Nidi'zh bixa' lo rē men: “Gak ban go xmod nzhakla go, gat nayi'te lo Dios”, per lē' rē kwa'n nitsinu men lē'i nile' mandad lo bixa', porke kad men xa' nagak ro' lo tu kwa'n gat lē', lē'i nile' mandad lo xa', ²⁰porke tu men xa' nguro' la lo rē kwa'n gat lē', por ngwayila xa' Señor Jesukrist, Me niza' yalnaban par dubta' ka' men; chi yubre xa' yocho'n xa' lo kwa'n gat lē', kwa'n mile' mandad lo xa', más nalats nzha xa' orze', ke or galo. ²¹Más wen nangalibe't xa' widi'zh wali pa' che'n

Jesukrist ke la' xa'i or ya milibe' la xa'i. ²²Por nizak men rë kuba', kuze'ka nzhab rë widi'zh re' se': "Lë' mbëk gao ska kwa'n nguiubre laxto' ma, no, lë' kuch ma milox ngoz, yubre ska le'n ben."

Lë' Jesukrist yi'd xtu wëlt

3 ¹Rë go men che'n Jesukrist, xa' dox nazhi' da; kure' rop yech kwa'n kixëla lo go, par naya'lt laxto' go, ñal ban go nambe lo Dios. ²Bitsila go rë widi'zh kwa'n midi'zh rë xa' mixë'l Dios nzhalá, no rë widi'zh kwa'n mika'b Jesukrist lo rë apost che'n Me, par midi'zh bixa'i lo go; no por ñila go rë widi'zh re', kinu go yalnaban par dubta'.

³Naki'n galo laka ne go: or mer la yi'd Jesukrist xtu wëlt, galo laka yo rë xa' xizhnu rë kwa'n nazhon che'n Dios, no ban bixa' nela xmod niza' la bixa'. ⁴Se' ne bixa' lo go: "¿Chon naga yë'd Krist, nela mila' xa' di'zh ga'? Ter dox nzhalá ngut rë xtit be, per yizhyuo se'gaka nake dizde nela or galo." ⁵Rë men re', gat nzhaklat bixa' gon bixa', por widi'zh che'n Dios, nguiuxkwa' yibë'; mbaino por widi'zh ska che'n Dios, le'n rë nits kwa'n nguzhin al yët dizde nzhalá, nguro' yuo bizh. ⁶No kun mis nits ba' milo'x Dios yizhyuo rë zhë che'n Noé. ⁷No kun mis widi'zh che'n Dios, kinuchao' Me yibë' no yizhyuo kwa'n nal re', nes par lox Mei kun bël; no kun bël ska re' lo'x Me rë xa' gat nzhont ro' Me, zhë kwa'n ngule Me par gab Me xmod gak kun kad rë men re'.

⁸No bitsila go, rë go men che'n Jesukrist, xa' dox nazhi' da; par Dios, lal tu zhë kun tu mil li'n, no tu mil li'n lal kun tu ngubizh. ⁹Gabt go kilë' Dios par le' Me rë kwa'n mila' Me di'zh, nela xa nile' rë men xigab ga'. Ka lë' Me, nzhap pasens kun rë men, porke gat nzhaklat Me lox ni tu men; lë' Dios nzhakla, la' men rë kwa'n gat lë' nak men, par ban bixa' xmod nzhakla Dios.

¹⁰Per yent cho nane, cho zhë yë'd Jesukrist, lë'i gak nela or ño tu wa'n lizh men ga', yent cho nane poka; orze' dox naye kwezh lo yibë', no lox rë kwa'n nzho loi kun bël; orze' yizhyuo kun rë nak kwa'n nzhin loi, rëi yëk.

¹¹No walika, se' lox rë kure', kuze' ñal ban go nab tsa par Dios, no gon go ro' Me. ¹²Dub kimbëz go zhin zhë yë'd Dios, bile' pa' go par le' go rë kwa'n nzhakla Dios, par zhin ga zhë

ze'. Zhë ze' lox yibë' kun bël; no rë kwa'n nzho loi, lë'i gak nela tu ser ga', zhu'ne por nazho' che'n bël. ¹³Per be, kimbëz kwa'n mila' Dios di'zh, tu yibë' kub no tu yizhyuo kub, plo nile' men nab tsa kwa'n nzhakla Dios.

¹⁴Kuze' rë go men che'n Jesukrist, xa' dox nazhi' da, dub kimbëz go gak rë kure', bile' pa' go par kwin go wen tu go kun xtu go nes par ya'n nambe go lo Dios, mbaino gab Me yent kwan tu kwa'n nak go. ¹⁵Bitsila go, lë' Dios nzhap pasens kun go, par gak ro' go lo rë kwa'n gat lë' nak go; nu wech be Pab, xa' dox nazhi' be, se'ga' mizobni' xa' par go, nela xmod mizini Dios laxto' xa'. ¹⁶Rë kure' nane la go or mixë'l Pab yech lo go, ter nzho widi'zh che'n xa' nagan par zobyek mene. Nzho xa' nazu't be's widi'zh che'n Dios, ña-ñë'd xigab yek bixa', kuze' nigoch bixa' rë kwa'n mizobni' Pab, nela xmod nile' bixa' kun más rë kwa'n nzobni' lo yech che'n Dios; kuze' yub bixa' yachib lo kwa'n lo'x bixa'.

¹⁷Kuze', rë go men che'n Jesukrist xa' nazhi' da, lë' go mbin la rë kure'; bikina go go, par nayakë go tich rë xa' niban xmod niza' la xa', orze' la' go rë kwa'n mitse'd la go. ¹⁸Bin go rë kure' par se'gaka ne go lë' Jesukrist nazhi' go, mbaino par más libe' go xmod pa' nak Me, Me nile' mandad be no Me ngulo' be lo kwa'n nzë'b xki be. Rë men ñal di'zh, tugaka Dios nazhon, nal no par dubta'. Sa' gake.